

Dewan Rakyat: Pemantauan Titik Panas Elak Jerebu Berterusan Di Lembah Klang Bernama
14 November , 2011

KUALA LUMPUR, 14 Nov (Bernama) -- Bilangan titik panas sentiasa dipantau bagi mengelakkan masalah jerebu berterusan di Lembah Klang, persidangan Dewan Rakyat diberitahu pada Isnin.

Menteri Sumber Asli Dan Alam Sekitar Datuk Seri Douglas Uggah Embas berkata pemantauan itu dilakukan melalui imej satelit yang dilaporkan oleh Pusat Khas Meteorologi.

Perkembangan cuaca semasa dan ramalan cuaca terutama ketika musim panas dan kering juga sentiasa dipantau dengan kerjasama erat daripada Jabatan Meteorologi Malaysia, katanya dalam jawapan bertulis kepada Karpal Singh (DAP-Bukit Gelugor).

Karpal ingin tahu tindakan yang diambil kerajaan bagi mengelakkan masalah jerebu berterusan di seluruh negara khususnya di Lembah Klang.

Uggah berkata tindakan lain adalah melaksanakan Program Pencegahan Kebakaran dan Pengurusan Tanah Gambut yang mudah terbakar memandangkan kebakaran tanah gambut merupakan punca utama jerebu setempat.

Selain itu, katanya, kementerian turut mempertingkatkan penguatkuasaan dan rondaan bagi mengesan sebarang pembakaran terbuka serta pelepasan asap dari kenderaan bermotor.

Beliau berkata kerjasama antara agensi-agensi yang terlibat secara langsung dengan kawalan dan pengawalan pembakaran terbuka turut ditingkatkan bagi membolehkan mereka melakukan persiapan awal, terutama pada musim panas dan kering yang biasanya berlaku pada Jun hingga September.

"Episod jerebu yang sering melanda negara terutama di Lembah Klang berpunca daripada pencemaran jerebu merentas sempadan akibat kebakaran hutan dan tanah yang tidak terkawal di Wilayah Riau, Sumatera, Indonesia," kata Uggah.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=626787>